

**APOLOGIE
DV CARDINAL
BVRLESQVE.**

A PARIS,

M. DC. XLIX.

APPOLOGIE

DU CARDINAL

PARLESOUE

A PARIS

DE LA LIBRAIRIE

12

3

❁❁❁❁:❁❁❁❁❁❁❁❁:❁❁❁❁❁❁❁❁:❁❁❁❁

APOLOGIE DV CARDINAL BURLESQUE.

E Sprits malins, Autheurs Critiques,
Escriuains piquans, Satyriques,
Dont le cornet est plein de fiel,

Qui rime voirement à miel;
Mais qui d'une faueur amere
Passe pour son grand aduersaire,
Direz-vous donc tousiours du mal

De nostre braue CARDINAL,
Et tousiours d'un stile profane
Deschirez vous sa sotane?

Dans vn phantastique repas
Vous le seruez dans tous les plats,
Croyant qu'il tirera ses chausses
Vous le mettez en toutes fausses,
Iusques mesmes au cour-boüillon
Appresté par quelque soüillon,
Qui n'entendoit que la cuisine,
Des animaux de la marine.

Vous croyez tous qu'il s'en ira,
Et que point ne vous punira,
Moy qui sçay de quelle importance
Est vn tel Prelat dans la France,
Et que les zelez pour l'Estat
Veulent garder vn tel Prelat;
I'entreprends son Apologie,
Et d'une Burlesque energie
Sans craindre que le Parlement
Condamne mon ressentiment.

4
Je veux contre la médifance
Soustenir fa haute EMINENCE,
Refuter tout ce qu'on a dit
Pour la dequiller du credit.
Premierement pour le lignage
Quoy que ce ne soit grand dommage,
Que d'estre fils de laboureur
Pourueu qu'on soit homme de cœur,
De vertu, d'esprit, de science,
Qualitez de son EMINENCE.
Dautant que ce sont les seuls biens
Qu'un homme peut appeller siens,
Si Iule ne vient pas d'Hercule,
Au moins vient-il du grand Iule:
Ainsi que Iules l'Empereur
Si Virgile n'est dans l'erreur.
En tout cas la Dame Cythere
Est de tous les hommes la mere,
Et d'un *Ergo* non captieux
Nous sommes tous parens des Dieux;
Car Cythere accoucha d'Enée
Sans qu'Anchise l'eut subornée.
Cythere qu'on nomme Venus
Dont enfin sommes tous venus;
Aussi bien que Monsieur Iule
Et que nostre CARDINAL IULE:
Concluons donc en mesme temps,
Que Iule & moy sommes parens;
Fut-il né dans vne boutique
Suiuant l'Histoire satyrique:
Car si son pere estoit Marchand,
Puisqu'il n'a point esté meschant,
Puisqu'il n'a point fait banqueroute
De sa Noblesse ie ne doute,
Et ie trouue qu'il faisoit mieux
Que nos Obereaux glorieux,
Nourris dans la faineantise
Qui ne trafiquent qu'en sottise,

Et

5
Et qui mourroient plustost de faim
Que de gagner ainsi leur pain:
Ne se fiant qu'à leur épée,
Dont leur esperance est dupée.
Si son pere estoit Chapelier
Il entendoit bien son mestier,
Et ie le prens pour vn augure
De son EMINENCE future,
Et qu'un iour il feroit fort beau
De luy voir vn rouge Chapeau:
Mais laissons à part la naissance
Que ie tiens dans l'indifference,
Ne parlons que de la vertu
Dont son esprit est reuestu,
Mieux que son corps n'est d'escarlata
Qui si fort à nos yeux esclate.
D'alleguer qu'il est Estranger,
C'est auoir l'esprit bien leger,
Et vouloir choquer la prudence
De la souueraine Regence,
Et de Monsieur le Parlement
Plein de cœur & de iugement,
Qui n'entreprit de le proscrire
Si ce n'est seulement pour rire:
Se moquant de son propre Arrest
Donné mil six cens dix-sept,
A cause qu'il estoit injuste
Indigne d'un Senat Auguste;
Puisque pour estre homme de bien
Enfin le pays n'y fait rien;
Puisque Dieu ne regarde en l'homme,
Ny Paris, ny Madrid, ny Rome,
Et qu'il remplit le Paradis
De Chrestiens de tous pays.
La Reyne mesme est Espagnole;
Ergo l'obiection friuole,
Que l'autre soit Sicilien,
Napolitain, Italien,

Mais quelqu'un fera difference
 De Ministère, & de Regence:
 Quoy qu'ils soient tous deux fort conioints,
 Et qu'ils s'accordent en tous points.
 On alleguera que la Reyne
 Tient à nous d'une forte chaisne,
 Puisqu'elle a deux fort beaux enfans,
 L'un d'unze, l'autre de huit ans,
 Qui luy font preferer la France
 Au grand pays de sa naissance;
 Mais moy qui sçais syllogiser,
 Et comme un Diable ergotiser,
 Je dis que Monsieur de Sicile
 Frere de feu Sainte Cecile
 Tient à nous fortement aussi
 Par mille chaisnes que voicy.
 Premièrement il est en France
 Plus que la deffunte EMINENCE:
 Ou pour le moins il est autant
 Dont pour moy ie suis tres-content;
 Quoy que mainte personne en gronde.
 Mais peut-on plaire à tout le monde?
 Non, iamaïs cela ne se fit
 Ny ne se fera par despit.
Secundò, il sert une Reyne
 Qu'on ne peut quitter qu'avec peine,
 Ayant mille perfections
 A gagner les affections
 De tous ceux qui sont aupres d'elle
 Qui la seruent avec grand zele.
Tertiò, il a fait venir
 Afin de mieux le retenir
 Un beau Neveu, trois belles Nieces
 Qui sont quatre fort belles pieces,
 Il est vray, ce sont des neveux,
 Les enfans nous touchent plus qu'eux:
 Mais que sçavons nous, si peut-estre
 Ne voulant pas faire paroistre

Qu'un Cardinal ait des enfans,
 Il trompe ainsi les médifans ?
 Car on ſçait que *Sacerdotes*
 Appellent *natos, nepotes*.
 Enfin ſoit enfans ſoit neveux,
 Il veut demeurer avec eux.
 Teſmoin l'illuſtre Mariage
 Avec l'homme de haut-parage,
 Qui certes ne fait pas tant mal
 D'attraper charge d'Admiral :
 Son Papa n'eſt pas des plus gruës,
 Et fait mieux que dedans les ruës
 Voir cent fois oſter les chapeaux
 A des Aſnes, & à des veaux :
 Il va tout droit à la Fortune,
 Et ie croy qu'il en prendroit vne
 Des Nieces en maturité
 S'il eſtoit en viduité.

Quartò, le CARDINAL en France
 A quelque petite cheuance,
 Il a meſme belle maiſon
 Tableaux, ſtatuës à foifon ;
 Car quoy que l'on me puiſſe dire
 L'enchere ne fut que pour rire ;
 Les acheteurs eſtoient amis
 Qui de tout rendre auoient promis.

Quintò, il a belle écurie
 Ie diſ belle ſans raillerie,
 Et ne croy pas que tes ayeux
 Ayent logé cheuaux guere mieux.

Sextò, il a des benefices,
 Peu à l'égal de ſes ſeruices ;
 Mais beaucoup quant aux reuenus
 Montant ne ſçay combien d'eſcus.

Septimò, icy tous les Princes
 Tous les Gouverneurs des Prouinces
 Sont tous ſes grands adorateurs,
 Et rien que ſimples crocheteurs,

Et les Eſcrivains de Satyre
 De luy i jamais n'oza médire.
 Encore ne tient-il qu'à luy,
 S'il veut meſme dès aujourd'huy
 De faire changer en loüanges
 Toutes ces Satyres eſtranges;
 S'il vouloit donner penſion
 Il trouueroit vn million
 D'Autheurs, qui feroient du haut ſtyle
 Honte à défunt Monſieur Virgile,
 Et s'il m'auoit meſme loüé
 Mecenas feroit mal loüé
 Au prix de ſa haute EMINENCE
 Qui doit touſiours regner en France,
 Tant durant la Majorité
 Que durant la Minorité.
 Oüy, malgré ces ames malines
 Qui l'accuſent tant de rapines,
 Juſque meſme à celle du Roy
 Mazarin nous fera la Loy.

F I N.